

國朝先正事略

國朝先正事畧卷之七

名臣

平江李元度次青纂

吳文端公事畧

吳公諱璵字伯美山西沁州人也順治十六年進士知河南確
山縣邑遭明季流寇殘破公招徠戶口墾田歲日益以方畧捕
獲盜魁戴騰字杖殺之大軍征雲南邑當孔道輿馬糧餉先事
嚴辦而民不煩康熙十三年以卓異入爲吏部主事歷遷郎中
十六年遷鴻臚少卿尋轉光祿少卿通政司右參議魏敏果公
象樞亟稱其賢二十年特擢右通政二十一年任太僕卿越
三月擢左副都御史請復敕督撫巡方疏曰令甲督撫于

命下之日卽杜門謝客。蒞任守令不得參謁。上官凡有舉劾。不過據道府揭報。及胥吏訪聞。愛憎毀譽。真僞相亂。督撫無由知。革火耗而火耗愈甚。禁私派而私派愈增。請敕直省督撫親歷各屬。以知守令賢否。或謂巡方恐勞擾百姓。夫督撫賢則必能禁送迎。卻供應。如其不肖。雖端坐會城。而暮夜之饋踵至矣。豈獨巡行足以勞民哉。又疏曰。巡撫及巡守道無一旅之衛。而提鎮各建高牙。前日撫臣如馬雄鎮。道臣如啟泰。雖懷忠秉義。空拳莫施。向使各有兵馬。奚至束手。宜及此時復舊制。使巡撫巡守道仍各管兵馬。減提督增總兵。分一鎮爲數鎮。以聽督撫節制。則無尾大不掉之患矣。二十八年除兵部右侍郎尋命。

巡撫湖北。湖北自裁兵之變。黠率指仇人爲賊黨。株連不已。公概不究。訊懲其妄。訐者人心大定。涇廩所屬郡縣。俾爲良吏。怙終則糾繩。無少貸。陝西饑流民入湖北。令有司分賑。全活數萬人。三十一年。

上念陝西西安雨水不調。襄陽地近西安。命截畱湖北漕米十萬石。貯荊州備賑。旣而命以荊州兵船載運至襄陽。公與糧道王道熙議以兵船灣泊大江。必由漢口溯流西上。方抵襄陽。計程二千餘里。今原運漕船將次撤回。莫若乘夏水。令原船順道運赴襄陽。僅七百餘里。卽以便宜行具奏。

上嘉之。八月以內憂去任。賻一無所受。曰非吾母志也。三十

三年

上以公有守有才。特用爲湖廣總督。三十四年。奉旨酌裁湖廣額兵。公區畫得宜。人情帖然。武岡州牧任三益。激民變。立捕其爲首者。置之法。而劾罷州牧。故事。土司見州縣吏。不敢抗禮。後大吏稍稍優遇之。漸以陵夷。公至。絕饋遺。飭謁見。長吏如故事。無敢肆者。奏增湖廣鄉試解額。

上命並增各省解額。三十五年。陞左都御史。旣視事。自戒曰。昔賢有言。司風紀者。當養人廉恥。不專以彈劾爲能。吾謬掌臺端。要在正己率屬。其可見事風生以褻憲體乎。三十六年。典會試。是歲五月。

上北征。同鑾顧迎。駕諸臣。褒左都御史吳瑛。及河道總督張鵬。居官之廉。翼日。又諭諸臣曰。吳瑛居官。卽爲所參劾之人。亦以清官好官稱之。百姓尤深感服。閱數日。以公爲刑部尙書。而以張公爲左都御史。三十七年。進保和殿大學士。兼刑部尙書。公熟於朝廷故事。中外章奏。可否見輒洞然。其有往事可援據者。雖久而不忘。奏對皆竭忱悃。

上每稱善。所薦引皆廉能吏。三十九年。會試。公以右臂偏枯引疾。特命爲總裁官。六月。御書風度端凝。額賜之。四十一年。具疏乞休。同官代奏請。

上曰。吳瑛爲人誠實。豈可聽之去。嘗以御臨米芾千字文。賜

公題其後曰吳典寬厚和平持己清廉先任封疆軍民受其實惠朝中之事面折廷爭必得其正朕甚重之故書於後以紀其能得大臣之體四十四年薨於位公居政府室無妾媵口不言清每語任外吏者曰地有遠邇俗有良澆然愛財惜命民情則一也能體此念自爲良吏矣遺疏入

上遣重臣奠茶酒予祭葬如典禮諡文端所司奏大學士缺上以公喪未歸縣缺弗補諭曰朕心殊不忍也翰林院進所撰祭文諭曰大學士吳典賢行甚多敕改撰其文有曰潔已奉公正身率屬總憲綱而丰裁卓立掌邦禁而讞獄持平慎以居躬清能容物其知公也深矣初沁州薦饑公糴米賑之全活

甚衆有司議增沁糧一千三百兩公力爭改正沁人德之立祠以祀雍正十年詔入祀賢良祠子四長時謙康熙三十三年進士

張文貞公事畧

公諱玉書字素存江南丹徒人父九徵字湘曉順治二年舉鄉試第一九年成進士博學礪名節歷官文選郎出爲河南提學僉事以公清著兄玉裁字禮存九歲通五經康熙丁未廷對直刺部院督撫陋弊讀卷者歎曰此長沙痛哭書也遂以一甲第二人授編修有名於時弟仕可恕可皆進士公以順治十八年進士選庶吉士授編修康熙十五年擢司業遷庶子充日講起居注官十九年進講乾清宮上問理學之名始於宋否公奏道理具在人心宋儒講辨加詳耳。

上曰。日用常行。無非此理。自有理學名目。彼此辨論。而言行不符者甚多。若不居講學名。而行事允合此。卽眞理學也。公以講幃奏對稱。旨加詹事銜。陞侍講學士。二十年。擢內閣學士。充經筵講官。教習庶吉士。二十二年。遷禮部侍郎。兼掌翰林院。二十三年。丁父憂。特遣學士王鴻緒奠卹。服闋。擢刑部尙書。二十七年。開音布監督高郵州石工。奏請閉塞支河口。爲中河蓄水。

仁皇帝命公偕圖納往勘。並徧閱毛城鋪高家堰及海口情形。詳加審度。瀕行。

上謂公曰。此行是非可否。當秉公陳奏。不可效能。一瀟託故推

諉也。公叩頭領訓。先是開音布疏劾高郵州河員擅開減水三壩。請議處。比公至。卽馳奏河員開壩。乃循舊例無罪。開音布瀆奏。應議處。八月還京。疏言奉命勘閭河形。黃河西岸出水頗高。年來大水未曾溢岸。則河身淤塞之說非也。海口岸寬二里。河流入海。絕無阻滯。諸減水壩應如舊閉塞。惟中河一道利濟舟楫。得此免涉黃河百八十里之險。殊關緊要。但形勢逼近黃河。旣不可挑寬。而太狹。又不能容納運河及駱馬湖之水。謹按蕭家渡楊家庄新庄口有衝決舊河之處。請飭河臣增建減水壩。相時宣洩。則中河舟楫可以長通。其支河口應如開音布所奏。永行閉塞。奏入。均如所議。是年冬奉特旨往浙江按

事調禮部尚書明年二月

上南巡駐蹕蘇州公自浙江還復命又明年拜文華殿大學士兼戶部尚書三十年冬命閱河工還朝繪圖以進時河臣靳輔請於高家堰增築小隄

上問公另築小隄有益否公奏曩者黃漲時淮流被逼故洪澤湖水視昔爲高今擬築小隄之處去高家堰不遠河湖水漲卽高家堰之大隄且不可保築小隄何益不如其已又言高家堰一帶河工惟史家刮至周橋最爲衝要不急於此處重設隄防雖多築隄數重無益臣度史家刮至周橋約一萬四百餘丈請飭河臣迅速加築此今日河工急務也

上深以爲然二十五年

聖祖親征厄魯特。駕臨克魯倫河。賊聞風奔竄。敕大將軍費揚古扼要路邀戰。斬殺幾盡。時公從征沙漠。預幃幄之議。上曰。朕愛養元元。以率土乂安爲念。噶爾丹旣受重創。從此邊境甯謐。必永享昇平之福。公奉王公以下文武百僚賀表。以進。行慶賀禮。尋充方畧正總裁。先是公聞母疾。請假三月得歸省。御書金剛經五部賜其母。并賜天廚鹿尾供甘旨。至是丁母艱。復蒙賜奠。御書松蔭堂額。賜之爲其母何太夫人身後光也。三十八年。

聖祖南巡公跪迎道左。賜賚有加。時

上親酌明太祖陵大書治隆唐宋四字卽命公從兩郡王捧安陵廟三十九年服未闋奉召入閣視事時河臣張鵬翮奏河工事宜

上問公奏對甚悉乃降旨諭河臣曰昨問大學士張玉書據

稱河水尙大高家堰俱爲湖水所侵如是則泗州盱眙安得不被水災河身之淺深以洪澤湖水之高下爲驗今聞洪澤湖之水比甲子年尙高數尺可見河身未曾刷深恐高家堰之隄過此以往未可知也四十年扈駕南巡賜銀千兩並皇輿表等物四月駐蹕蘇州命偕學士揆敘閣召試諸生卷得汪泰來等五十三人尋駐蹕江南又偕揆敘等閱卷得錢棨

世等五人及御舟次高資港公奏曰前去京江不遠臣之敝廬在焉苦城中無駐蹕之地輿情雖切未敢恭迎御輦入城請行幸江天寺畱駐數日與親臨鐵甕城無異也得旨張玉書懇求諳切姑再畱一日賜御書恭儉爲德匾額一楹聯一尋賜金山月夜詩一幅又頒御用東珠涼帽及各種服物四十六年張公鵬翮請開溜淮套河恭懇聖駕親臨相度二月聖駕自京起蹕及御舟泊清河口上親往武家墩周視良久見所樹標竿多屬民塚非掘塚不能開濬

上惻然乃召河臣極斥其非河臣語塞叩頭請罪公奏曰向者

老人白英曾有引汶水分南北之議策之善也不若別作壩引汶水通漕其下流專以惟水敵黃黃水趨海此萬世之利也上善其言四十九年以疾乞休溫旨慰留五十年五月從上幸熱河甫至疾作數遣御醫調治不能起未及繕遺疏而薨壽七十薨之日賜帑金千兩庀喪具又命內務府監製帳幔沿途護送至京諭稱公耆舊老臣久任機務直亮清勤下所司優卹御賜挽章親書頒發加贈太子太保諡文貞五十二年奉旨大學士張玉書久任機務小心恪慎懋著勤勞朕追念難忘伊惟一子張逸少可從優陞侍讀學士以示篤眷舊臣之意公學問淵雅風度嶷然年二十登仕籍受

聖祖知遇凡五十年爲太平宰相二十年朝夕啟沃得大臣體
在講幄每據經義納忠莫由得其獻替之迹詞臣曹禾疏請封
禪公謂非古禮建議駁之事遂寢公退清齋讀書盥匱無妄勝
友愛之篤比於蘇氏性淡薄不肉食夜臥未嘗解衣辨色卽起
每食粥一甌麤糲一盂或山藥少許封公貽書戒之曰此非養
生之道也食不厭精汝未讀鄉黨耶公悚然爲加餐封公研精
三傳於明代人物能縷舉其世系與其門生姻戚公總裁明史
多稟承家學焉所作古文辭及制舉業皆春容典雅渢渢乎盛
世之音又集中拖諾山狼居胥山二碑敘述

聖武神功最爲詳贍足以昭示萬世紀平定江南滅闖獻二賊

及三路進師下雲南平水西賊等事。皆得諸耳聞目見。足以彰
開國之鴻猷。其餘碑誌亦多。國初將相事跡。可備考核。燕許
大手筆。蓋無愧云。雍正中。詔入祀賢良祠。

于清端公事畧

孫準

公諱成龍字北溟山西永甯人順治十三年以副貢知羅城縣年四十有五矣臨行與友書曰某此行絕不以溫飽爲念所自信者天理良心四字而已羅城烟瘴地官廨在叢箐間插棘爲門虎白晝行庭中公累土爲几案旁置爨釜一盂一召吏民從容問疾苦皆感公至誠益樂就爭輸田賦初鄰徭歲率三四至殺掠人畜公嚴保伍勒鄉兵將搗其巢徭懼自投不敢復犯界數遣子女問安每春時命兩徭舁竹舉行田野中見力耕者輒呼與語相勞苦民率婦子羅拜或坐樹下與飲食笑語歡如家人公獎勤扶惰民大勸始至從僕皆死亡羅人憐公開斂金錢

跪進云。知阿耶苦聊供鹽米資。公笑謝曰。我一人何須此。可持歸市。甘旨奉若父母。一如我受也。居數年。家人來羅人。則大喜。又進金錢如初。公仍卻之。眾泣。公亦泣。在羅城七年。招流亡。修學校。增俾浚隍。定昏喪之制。以卓異遷知合州。羅人遮道呼號。追送數百里。一眇者獨畱不去。公問故。曰。民習星卜。度公橐中裝不能及千里。民技猶可資以行也。公竟賴其力達合州。州領縣三。遺黎才數百人。正賦十五兩。而供役繁重。府帖下取魚。公曰。民窮極矣。安所得魚。卒不與。且極陳民困狀。盡裁革之一。僦一羸馬自隨。賃牛種。招集流亡。旬月間。得戶千計。再遷黃州。同知駐岐亭。地多幽壑。江湖爲盜窟。公捕得九人。大集諸父老。曰。

能保後不爲盜者。貰之保二人。其七人卽諸父老。前取大索。駭
繫悉坑之。眾股栗。又獲巨盜彭百鈴。貰其罪。令捕盜自贖。無脫
者。巡撫張公朝珍。器之。舉卓異。吳三桂反。檄攝武昌府事。問禦
亂策。公言。安人心。莫先下。令停徵。張公已草奏。與公意合。遂盡
以兵事屬公。時大軍雲集。供億皆此。嗟辦。惡少愚禁旅爲姦。公
立置之法。白大將軍申軍令。甲士擁公。譚公不爲動。徐敘去。謀
指武昌大姓通賊。以藏兵器爲徵。公言。巨室多避兵。梁子湖藏
械。備他盜。無足怪。跡之。果無他。遷知建甯府。奏改武昌大兵征
岳州。檄造浮橋於蒲圻。賊驟至。公入城守。橋以山水暴漲圯。坐
罷職。會東山寇作。張公命討賊。公請得便宜從事。許之。問需兵。

幾○何○曰○前○守○蒲○圻○數○人○足○矣○先○是○大○治○賊○黃○金○龍○亡○匿○劉○君○孚○家○君○孚○素○黠○猾○收○召○亡○命○亦○閒○爲○官○吏○擒○盜○賊○嘗○隸○公○岐○亭○役○至○是○得○三○桂○僞○劄○與○金○龍○潛○結○周○鐵○爪○等○期○七○日○起○事○事○泄○君○孚○恐○遂○以○五○月○反○於○曹○家○河○官○兵○爲○所○敗○公○行○次○陽○邏○偵○知○君○孚○雖○反○衆○未○合○遂○直○趨○賊○寨○未○至○十○里○止○宿○榜○示○脅○從○者○許○自○首○免○罪○過○三○日○以○從○逆○論○投○首○日○千○人○賦○勢○孤○欲○卽○降○懼○誅○公○遣○一○人○持○檄○往○諭○而○自○騎○一○羈○一○人○張○蓋○一○人○鳴○鉦○前○導○命○行○呼○太○守○來○救○爾○山○中○人○君○孚○匿○後○山○夾○道○伏○鎗○弩○數○百○公○疾○驅○抵○賊○舍○坐○聽○事○賊○衆○環○列○公○問○老○奴○安○在○君○孚○舊○隸○麾○下○故○呼○以○暱○易○之○又○問○山○中○雨○水○禾○稼○若○何○若○良○民○何○爲○作○賊○取○屠○戮○

時方酷熱。若父母妻子。匿何所得。母苦耶。賊皆羅拜。泣。公曰。熱甚。須少憩。遂熟睡。鼾聲如雷。移時寤。又謾罵君孚。老奴何爲久不至。客至。乃不設酒脯。君孚初懼。見紿。及是出叩頭受撫。卽日降。其衆數千。問金龍安在。曰。在望花山。卽令導行。掩其不備。擒斬之。捷聞。張公持露布語僚屬曰。人謂我不當用。醉漢今定何如。公常襄事。秋闈大吏鴈公抵掌論時事。飲數十巨觥。吏人竊笑。公酒狂。故張公及之也。八月。復職。調黃州。甫抵任。湖北大亂。何士榮反。永甯鄉陳鼎業反。陽邏周鐵爪。鮑世庸反。白水販劉啟業反。石陂各擁衆數千。號十萬。逼趨黃州。時援軍皆赴湖南。黃州吏民才數百。至不能備。關析或議退保麻城。公曰。黃州七

郡咽喉也。棄之則荆岳瓦解矣。吾誓死不去。然坐困亦非策。當
勦之。賊雖眾皆取士。榮進止先破士。榮餘可不戰下。遂集鄉兵
得二千人。別遣黃岡知縣李繼政擒鼎業。士榮已據黃土。均遣
把總羅登雲、武舉張尙聖迎擊前鋒。戰少卻。公疾馳抵尙聖營。
日午鄉兵大集。有眾五千屯箔金寨。與賊對壘。詰旦士榮率賊
數萬分東西路來攻。東路賊少。登雲領千人禦之。而公率千總
李茂昇當其西。尙聖攻右把總吳之蘭。攻左戰始合。之蘭中礮
死。賊闕益急。火燎公鬚。或勸少避。公叱之曰。今吾死日也。敢言
退者斬。遂鞭馬直前。回顧茂昇曰。我死可歸報張公。茂昇恐失
公。急發矢殪其大旗。軍隨進。茂昇馬被鎗棄。馬射殺二人。易馬。

進戰復手刃數人而尙聖自右山繞出賊後來擊賊大敗斬賊數千士榮左臂斷就擒登雲擊東路亦追奔數十里公得賊名籍立焚之乘勝至呂王城眾欲少憩公曰破竹之勢不可失也方炊覆釜以進公據鞍草檄馳諭有能擒賊獻者重賞投誠者待以不死脅從歸者但閉門坐家無軍器卽從賊概不追問藏兵仗者卽良民亦誅死於是賊眾聞士榮擒名籍已燬各解散至白水畷鐵爪世榮等欲趨保石子寨公已遣人守隘不得上悉擒之又分眾平石陂賊乃勒石岐亭班師自誓師至此二十有四日公以鄉民數千破賊數萬不費公家絲粟黃州平時康熙十有三年十一月也次年秋大饑發廩賑卹全活數萬人十

五年水旱災。訛言復起。公故示暇。豫修赤壁亭榭。日與寮吏。歛詠飲射。其閒民皆曰。我公如此。復何憂。會丁繼母艱。士民乞畱者數萬有。詔奪情視事。十六年。總督蔡公毓榮等奏復江防道。以公任之。明年。遷福建按察使。民遮送至九江。凡數萬人。哭聲與江潮相亂。十八年春。抵閩。時耿精忠亂後。康親王駐軍省會。閩民多以通海獲罪。公力白王。言諸案所牽引。多平民。宜省釋。覆錄時。大吏有難色。公指庭前婦孺曰。此曹豈能反。皇天在上。獨不爲方寸地耶。王久聞公名。至是益重公。悉從其請。巡撫吳公興祚薦公廉能第一。遷布政使。禁軍月徵莖夫數萬。公爭於王前。罷之。滿兵掠浙東子女。役爲奴者數萬。公贖歸之。各屬。

納賦皆應時收。不增銖黍。署中新米不給。至無衣可典。日或不
再食。隨征滿漢大臣。朝使者有時來過。徑入臥內。或繞署周行。
几案閒蛛絲鼠跡。文卷書冊外無長物。咸歎曰。于公清苦天下
一人而已。外番貢舶有所獻。悉屏之。或呈樣香。一嗅卽持去。貢
使齧指作禮曰。天朝有此清官。吾僑所未聞見也。十九年遷
直隸巡撫。知縣某經道府揭報。具牘訐告。公疏請嚴定反噬。換
制律著爲令。又疏請豁免宣府所屬東西二縣及懷安蔚州二
衛水衝沙壓荒糧三千餘石。銀千餘兩。從之。又因災疏請緩征
並平糶。詔卽以平糶之米作賑。會旱步禱雨立沛。禾黍重歧。
三穗民號曰于公穗。尋劾青縣令趙履謙貪黷狀。論如律。二十

年春。陛見。賜坐。賜茶。面諭曰。爾爲今時清官第一。朕所深知。因問。勦撫黃州土賊時事。又問。屬吏中亦有清廉者否。公以知縣謝錫衮同知何如玉羅京對。

上曰。爾所劾趙履謙甚當。公奏。履謙過而不改。臣不得已劾之。上曰。爲政當知大體。小聰小察不足爲。且人貴始終一節。其勲旃旌。賜食。御書房。又賜帑金千。良馬一馬。

上所乘也。越數日。御製詩。手書賜之。尋遣官助公賑宣府各屬饑。詔蠲免本年額征。及積年帶征。秋公請緩真定府屬房稅銀。又請破格全蠲霸州本年田賦。均報可。冬。乞假歸葬。優詔許之。未幾。調兩江總督。瀕行。舉直隸守道董秉忠通州知州。

于成龍南路通判陳大棟柏鄉知縣邵嗣堯阜城知縣王燮高陽知縣孫宏業霸州州判衛濟賢並堪大用得旨俞行抵江甯官吏皆望風改操知公好微行遇白鬚偉貌者羣相指目搔檄郡縣條上便宜皆爲興舉會江甯知府闕詔卽以通州牧于成龍擢補成龍漢軍人由廕生起家後官河道總督諡襄勤者也南中風俗侈麗公至人爭衣布褐布價驟騰士民有歡笑無管絃游惰不空手樞坊無鎖公自治官書夜中且不寐性喜飲至是累月不一醉嘗中夜苦飢索少米作糜不得笑而止時苞苴盡絕午日遣視察吏無敢以角黍相遺者建虹橋書院擇高才生講習其中親往訓課副都御史馬世濟還自江南劾公

年衰爲中軍田萬侯所欺蔽部議奪萬侯職公休致特詔公
留任二十三年春巡海還兼攝江蘇安徽兩巡撫事四月十八
日疾作召屬吏與訣端坐逝至夜漏盡坐不歆顏色如生年六
十有八公自服官後未嘗攜家屬入署至是將軍都統暨寮吏
入其寢室見周身布被袍一襲韉帶各一堂後瓦甕米數斛鹽
豉數盎而已訃聞賜祭葬予諡清端七月學士錫住勘海
疆還

上詢公在官時聲績錫住奏其清廉但因輕信或爲屬僚欺罔
上曰此與成龍不合者造爲此言耳居官如成龍者有幾十一
月南巡至江甯諭知府于成龍曰爾劾法前總督于成龍

正直潔清。乃爲不負。又諭閣臣曰。原任總督于成龍。朕博採
輿評。咸稱爲古今第一廉吏。可加贈太子太保。廕一子入監。會
御試詞臣。作理學真偽論。納卷時。

上特諭曰。理學無取空言。如于成龍。不言理學。而服官至廉。斯
卽理學之真者也。自

天子廣厲風節。恩禮始終。由是士皆慕效。公吏治烝烝一變矣。
公薨後。軍民爭繪像祀。江甯。蘇州。及黃州。皆有祠。御書高行
清粹四字爲祠額。并書櫺聯。賜之。公軀幹修偉。紅頰隆準。美影
髯。精神炯炯。四映與人。交不擇貴賤。談燕終日。一語涉私。卽正
色斥詰。每稱曰。上帝臨汝。又曰。日。日。監在茲。屬吏畏公威。若負霜。

雪及論事輒霽顏商推用此雖嚴憚愈益親樂之年饑公屑稊
糲米爲粥與僮僕共之屬吏至亦以是進曰如法行之可得畱
餘以賑也性強毅而臨事應變無方當黃金龍就擒公亟賞劉
君孚百金眾疑其過公曰金龍之擒實由君孚密計君等不知
耳於是其黨疑君孚賣金龍各散去又以閒離其親屬君孚遂
鬱鬱以死公狀如鄉里學究而用兵如神尤善治盜所用游徼
及降盜恒撫以恩威輒先來報知武昌時營弁某弟素無賴適
遠歸是夜餉被劫弁告弟所爲已誣服獄具公破械縱之巡撫
驚問曰盜寃真盜何在公指堂下一校曰是真盜也餘黨進香
木蘭山今晚獲矣尋獲盜贓尙在校家卦識宛然江甯盜號魚

壳者。拳捷。倚駐防都統爲解。有司莫能擒公。抵任。官吏遠迎。日
盱不至。方驚疑。而公已單車入府矣。羣吏飾廚傳。饋餼。率皆不
受。按察使某年家子也。請具一餐爲雅壽。公笑曰。以他物壽我。
不如以魚。壳壽我。按察使險意出。乃以千金購名捕。縛置獄。是
夕。公秉燭坐。一男子持匕首自屋梁下。公叱何人。曰。魚壳也。公
解冠几上。指其頭曰。取壳。長跪笑曰。取公頭。不待公命也。方下
梁時。如有物擊我手。不得舉。乃知公神人。某惡貫盈矣。自反接
銜。匕首以獻。公曰。國法有市曹。在遲明獄。吏報失盜人。情洵洵
而公已命。中軍將魚壳斬決西市。孫準。康熙二十五年。由廕生
授臨清州知州。累官至江蘇巡撫。有賢聲。

彭古愚中丞事畧 郭 琇

彭公名鵬字奮斯號無山一號古愚福建古田人順治十七年
舉人康熙十三年逆藩耿精忠叛逼公受僞職乃卻粒飲水椎
齒出血堅臥三年不起逆平授三河知縣邑地瘠當要衝旗民
雜處公拊循釐剔不畏強禦有中夜矯傳內旨者公察其詐
延與語陰遣人發其橐具得奸狀寘之法每治獄發摘如神吏
民不敢欺鄰邑疑獄不能決憲司檄公往輒白其寃二十七年
冬

聖祖東巡駐蹕三河召問公不從耿逆及在籍在官狀賜
帑金三百兩諭曰爾居官清正不受民錢以此養爾廉勝民

開銀數萬兩多矣。明年順天尹許三禮劾公獻獄遲玩。詔巡撫于公成龍察核。白其枉。部議落職。詔降二級。畱任。尋以盜案積降十三級。皆得。旨畱任。又明年。詔舉天下廉能官。李尙書天馥首以公薦。與嘉定令陸公隴其並行。取。請假歸葬。卽家。授給事中。會關中旱蝗。赤地千里。公一日上三疏。言秦晉豫三省有司不恤民狀。先是西安鳳翔及平陽等郡饑。詔發帑賑。又命河南運米十萬濟陝西。至是以公疏下。所司確議令指實再奏。公復指涇陽令劉桂剋扣籽粒。聞喜夏縣匿災不報。猗氏令李澍敲斃災黎。磁州牧陳成郊濫派進價。夏邑令尙崇震派銀包運南陽。守朱璘曖昧分肥狀。詔各巡撫察審。不皆

實議處如例得旨寬免三十三年劾順天學政李光地聞

命在任守制不哀痛力請終喪僅乞假九月悖理乖情應罰令
離任留京終制疏下九卿議從之初公劾癸酉順天鄉試舉人
楊文鐸等文理荒謬磨勘官馬士芳有通賄情弊乞

上親訊下九卿察議以文鐸卷有疵應罰停一科別無情弊公
奏涉虛應奪職有旨令回奏公奏會議諸臣聽考官徐倬彭
殿元節說故入言官罪

上特免公處分倬殿元休致至是公猶以論文鐸文與廷臣忿
爭詔解任以原品頂戴効力南河三十六年召補原官明年
授貴州按察使又明年擢廣西巡撫墨吏望風解綬去既抵

任劾免貪酷令喻兆紳葉之莘粵西舊未設武科公始奏行之
會湖廣總督郭公琇請除學政積弊臺臣鄭惟孜等條陳順天
鄉試事宜九卿未盡議行諭直撫李光地河督張鵬翮與郭
琇彭鵬並著清廉命各抒所見勿瞻徇公條覆多見施行時
豫撫徐公潮之任

上諭之曰爾能如張鵬翮李光地郭琇彭鵬則不但爲當今名
臣卽後世亦足取重矣三十九年調撫廣東下車日收民詞五
千紙公愀然曰堂上一點硃民間千點血健訟何爲民咸感悔
值歲旱步禱烈日中親詣獄廬囚發倉穀平糶甘霖立沛奏免
粵西解京銅鐵七萬斤歡聲載道又言粵西州縣私派巧立名

色日均平大半費於饋送如臣未入境之先購備撫署器物皆出諸此臣當堂發還俾自悔艾其不派均平者又取盈於火耗有明加賄加等弊疏下部嚴禁時肅公永藻代爲廣西巡撫上諭以效彭鵬所行又諭閣臣曰彭鵬前任三河時但聞有賊卽帶刀乘馬往擒治毫無畏懼朕深知之御史王度昭劾公撫粵西時受藩司欺蒙及掩覆浮銷狀詔下公回奏公疏辨諭責其忿激粗戾且曰凡被劾回奏止應辨晰是非不應支離牽引彭鵬爲言官時亦曾劾人今爲王度昭所劾乃訐奏度昭曲庇親戚又未指出實據雖操守清廉殊失大臣之體其嚴飭行四十一年奏免追積欠兵米價銀從之四十二年冬病篤

特詔遣中書往視明年正月薨年六十有八遺疏聞

天子軫惻有實心供職克盡勤勞之褒賜祭葬粵人肖像祀之尋入名宦祠著有古愚心言八卷當是時公與郭公直聲震海內天下並稱曰彭郭

郭公名琇字華野山東卽墨人少時勵志清苦讀書深山絕壑中四無人跡公蘊火中宵讀弗輟齋鹽糲汲皆手任之康熙九年成進士越十年授吳江知縣賦煩俗悍號難治公蒞事七年弊絕風清循聲爲東南冠二十五年巡撫湯文正公薦其居心恬淡澁事精銳宜與行取部以催征未完議格特旨允行授御史時河督靳輔請別築高家堰重隄行屯田法與按察使于

成龍議不合。詔尙書佛倫等往勘。從靳議。公劾靳治河無功。詔九卿察議。未上。會靳入覲。命與廷臣會議河工事宜。公復劾靳派累擾民。靳坐罷任。江淮人誦公疏。皆額手稱善。擢僉都御史。先是。公劾大學士明珠。余國柱結黨私行。背公納賄。及尙書佛倫等會議。會推附和要索。狀請加嚴譴。於是明珠等降黜。有差。尋遷太常卿。晉內閣學士。充經筵講官。吏部左侍郎。二十八年。擢左都御史。疏劾少詹高士奇。都御史王鴻緒。編修陳元龍。王項齡等。招搖依附。狀皆罷之。一時輦下栗然。居無何。御史張星法劾山東巡撫錢珪貪黷。珪奏辨所劾皆誣。由公會致書於珪。屬薦卽墨高令未允。遂挾嫌使星法誣劾。事下法司察治。

獄未具。公奏都御史馬齊於會訊時。多方煅鍊。必欲坐公指使誣劾罪。

上責公疑揣法司。尋法司以星法誣珏。公致書屬實奏。並應黜。詔星法降二級。畱任。公降五級調用。尋休致。公自是跼伏荒鄉。足不入城市。見者不知其爲掌憲大僚也。明年以牽連吳江漕項虧空事。應赴質時佛倫巡撫山東。誣劾公父景昌。原名爾標。曾入賊黨伏法。公私改父名。濫請封典。部議追奪。并奪公冠帶。逮赴江甯勘治。議遣戍。得旨寬免。三十八年春。

聖祖南巡。公迎駕德州。諭閣臣曰。郭琇前令吳江。百姓至今感頌。其人有膽量。無朋比。可授湖南總督。一時貪墨吏皆投

劾去而公益以鎮靜爲先。滌除煩苛。務持大體。疏陳黃州武昌二郡兵米二萬七千有奇。請改折色運荆鄖。以利輸挽。又江夏等十三縣有故明藩產。賦過重。請照民糧起征。並請豁免江夏漢陽嘉魚瀕江水埧地租三百餘頃。皆俞行。三十九年入覲。具疏訟冤。言臣父郭景昌係縣庠生。邑匪郭爾標合邑皆知伊無妻室。安得有子。不知佛倫何所聞而誣蔑若此。佛倫時官大學士。

上親詰問。以悞疑舛錯對。命仍給誥軸。及陞辭奏請清丈地畝。且云湖南地廣民稀。恐清查後賦額較前少減。上曰。果於民有益所減雖多亦所不惜。若不清丈而以荒田派

征有累窮黎斷不可也。命公具疏以請。公復條上三事。一修築隄塍。嚴定處分。一無用糧。糴宜停修。一苗疆官吏宜通融調補。又疏言錢糧攤費包收之弊宜除。雜派之陋規宜去。征糧之滾單宜行。訟棍宜治。濫刑宜革。捕役誣盜宜懲。屍親抄掠宜禁。強族阻葬宜責飭。諭嘉其實心除弊。四十一年。給事中宋駿業劾公衰廢不職。詔侍郎傅繼祖。甘國樞。浙撫趙申喬。前往察治。坐徇隱諱飾罷歸。抵里門。盡出俸金。周族黨。歲饑。竭貲倡賑。鄉閭德之。五十四年卒。年七十有八。入祀鄉賢。並祀吳江名宦。當康熙朝。公與彭公由縣令起家。並以抗直聞。趨死不顧利害。賴。

聖祖寬容。屢排羣議。特簡用彭公所劾之李文貞公所劾之
靳文襄陳文簡王文恭諸公。皆號稱賢者。二公以春秋法責備
之。
上既不以為非。用作敢言之氣。而為所劾者亦未嘗以一胥掩
大德。鑑空衡平。悉付諸公論。大哉。聖人執兩用中之盛軌。誠
超出前古萬萬云。

張文端公事畧 子廷瓚 廷璠 廷琰

公諱英字敦復號樂圃安徽桐城人父秉彝字孩之明季諸生爲文一本經術以兄秉文官山東左布政二親年老遂絕意仕進家居侍養能爲孺子歡秉文殉難山東泣走數千里攜孤扶櫬歸及親喪廬於墓上墓樹交花人以爲孝感云公以康熙六年進士入館選丁父憂歸十二年以編修充日講起居注官累遷侍讀學士十六年九月

上以公及掌院學士陳公廷敬每日進講甚有裨益天漸寒特賜貂皮各五十張表裏緞各二十疋十月諭閣臣曰朕不時觀書習字欲得文學之臣朝夕置左右講究文義給內廬居之

不令與外事遂設南書房。命公入直。賜第西安門內。詞臣賜居內城。自公始。當是時逆藩播亂三方。征討凡出師。運餉發謀制勝。無一不斷自聖心而。

上益孜孜於經史之學。公首供奉南書房故事。經筵有常期。而上日御乾清門聽政。後卽適懋勤殿。召公入講。長而進。終酉而退。暫退輒復宣召。或當食吐哺趨宮門。漏下十許刻。迺歸。公小心慎密久之。上益器重。每幸南苑及巡行四方。未嘗不以公從。公立朝數十年。未嘗一日去。

上左右一時典誥之文多出其手十九年晉翰林學士兼禮部侍郎銜明年以葬父乞假優詔許之特賜白金五百兩表裏二十疋資墓田之用又特予公父秉彝卹典如公階二十五年教習庶吉士遷兵部右侍郎明年調禮部充經筵講官二十七年給事中陳世安劾公遇

孝莊章皇后大喪一切典禮不詳慎參稽不與滿堂官面商疏稿部議鐫五級調用特旨畱任明年擢工部尚書又明年調禮部公自躋卿貳至典秩宗皆兼掌院學士並管詹事府蓋二職

上所甚重難其人以爲非公莫屬也尋以編修楊瑄撰擬諭

祭都統佟國綱文引用悖謬公坐不詳審更正議降調得旨
罷禮部尚書仍管翰林院詹事府三十年教習庶吉士明年復
禮部尚書兼管翰詹如故先後充國史方畧一統志淵鑒類
函政治典訓總裁官三十六年與熊尚書賜履同爲會試正考
官尋乞休溫旨慰留疏辭兼管翰詹允之三十八年拜文
華殿大學士兼禮部尚書公少清貧癸丑分校禮闈家人猶經
旬乏食姚夫人撝得麪數斗遂舉家食麪湯將一月其泄官隨
地自盡不務表襮不列密事不許人過失汲引人才如不及然
有所薦舉終不使其人知以是所居無赫赫名及觀南書房記
注然後知公在講筵凡生民利病四方水旱知無不言造膝前

席多社稷大計。

聖祖嘗語執政張英老成敬慎終始不渝有古大臣風然則公之立身與所以自結於

上者居可知矣公爲人忠實無畦畛外和內剛一私不染白同官及後進之士皆傾心相嚮公退惟手一編蒔花鼓琴自娛雜賓不敢至其家居族黨鄉鄰下逮臧獲皆得其和雖奸僉小人無所寄怨惡用此知與不知皆推爲鉅德長者然性實介特義所不可雖威重不能奪與物無忤而黑白較然自壯盛卽有田園之思作芙蓉雙溪圖記屢見諸詩歌往往流連不已

上亦曲鑒焉四十年冬請告優詔許致仕瀕行賜宴暢春

國。諭部令沿途馳驛。毋限常額。公致政後。嘯詠於林泉者。凡七年。自言生平無他嗜好。惟酷好看山及種樹。著恆產瑣言。聰訓齋語。諄諄以務本力田。隨分知足爲誠。先是。御書篤素堂額。賜公。名所著曰篤素堂文集。又著易書衷論二十卷。四十四年。

聖祖南巡。迎駕淮安。疊拜。御書謙益堂葆靜廬額。并聯幅。畫卷白金之賜。隨駕至江甯。

上將返蹕。以在籍臣庶攀籲。命畱一日。公復奏請得旨。念老臣懇求諄切。許再畱一日。啟行。四十六年。迎駕清江浦。仍扈蹕江甯。賜御書對聯。世恩堂額。及書籍人役。亦允公奏請。

留一日。四十七年九月薨。年七十有二。遺疏至。

上震悼。優詔議卹。賜祭葬加等。謚曰文端。

世宗御極。有甘盤舊學之思。贈太子太傅。賜額曰師模如。在。又曰忠純貽範。雍正八年。詔入祀賢良祠。子廷瓚。字占臣。康熙十八年己未進士。累官少詹事。文行爲館閣推重。己卯與試山東。與同事先矢於神。所拔皆宿學士。乙亥六月。廷瓚任侍讀學士。

上召翰詹八人。至暢春園。賜宴。賜扇。文端及廷瓚皆與焉。又兩。賜御書額曰玉堂。曰傳恭堂。先文端公卒。廷玉官太保。大學士。自有傳。廷瓚。字藥齋。康熙五十七年一甲二名。賜進

士及第授編修。雍正元年，典福建鄉試，累遷侍講學士，督河南學政，以封邱生員罷考事落職。尋授侍講，擢祭酒，疏請，敕將軍提鎮轉飭所屬將弁，每朔望集兵丁宣講。

聖諭廣訓從之。遷詹事。七年，督江蘇學政。十年，典浙江鄉試。十一年，擢禮部侍郎，再督江蘇學政。會文端公入祀賢良祠，諭祭於家。命廷璐就任所回籍舉襄典禮。乾隆元年，開博學鴻詞科，拔劉文定公綸爲第一人。廷璐所薦也。六年，典浙江鄉試。九年，自陳年老，予告歸。明年卒。廷瑑，字桓臣，雍正元年進士，由編修累遷侍講學士，晉詹事。乾隆元年，遷工部右侍郎，充會試副考官。初在翰林，嘗充日講起居注官，起居注向無條例，所

司繁簡任意允漏不稱史體。廷瑒精思爲之。在館十餘年。編纂詳贍稱旨。雖擢侍郎。仍兼起居注官事。本朝官不爲翰林。而仍職記注者。獨廷瑒爲然。五年提督江蘇學政。九年調補內閣學士。兼禮部侍郎。典試江西。十一年乞病歸。性誠篤。細微必愼。每當入朝。自書職名讀之。曰某官張某。又屈指計之。曰幾字。視紙上三四而後敢出。督學試士日。公服竟日。雖燕處不脫人間之曰。取士國典也。敢忘共乎。旣告歸。則益以舊德篤行自守。其自奉甚陋。或人所不堪。雖其家人皆竊笑之。然至族黨有緩急。出千百金不吝也。未嘗私受人一錢。門生某巡撫江西過桐城。奉數百金爲壽。曰吾幸足衣食。安用金爲。又有餽饋者。曰吾生

平無病焉。用此其乞歸也。兩兄皆先後請告。而廷璩最後歿。上聞。顧謂左右曰。張廷璩兄弟皆舊臣賢者。今盡矣。安可得也。因歎息久之。其卒以乾隆二十有九年。年八十有四。廷璩子若需。官翰林院侍講。若需子曾。做官至少詹事。桐城張氏四世皆爲日講起居注官。而曾做尤講正體例。能繼桓臣侍郎之業。掌院劉文正公嘗歎異之。俾獨任一館之事云。廷璩子若需。康熙戊子舉人。任嚴州同知。攝義烏篆。捐金造東門巨橋。邑人名張公橋。建祠橋側祀之。遷梧州知府。有異政。擢鹽驛副使。卒。官特贈按察使銜。雍正九年。祀廣西名宦。

李文貞公事略

弟光坡
猶子天寵

鼎穀
鏡橋等

光型

子鍾倫

鍾佐

公諱光地字晉卿福建安谿人祖先春字克建年十二父以非
辜陷縲紲詣郡哀訴守奇之立出其父山寇肆掠傾囊贖難民
全活甚眾南安洪氏女陷賊以重賂贖回復以計脫其父歲大
饑設法賑濟賊圍其寨力戰得全義俠聞鄉里父兆慶字賴甫
明諸生性至孝究心程朱之學順治十二年避難山砦中全家
十二人被賊虜獨兆慶得脫其兄日燦自遠歸慷慨詣賊乞釋
此十二人賊義之具飲食慰遺然故弗釋也明年夏日燦募壯
卒合家童百人夜緣山背上路峭險登者才二十八人吹螺劫
賊帳會天大霧不辨眾寡賊大驚奔竄出其季弟弟子二人餘

紫他山不能得賊徵其黨萬餘來日燔用百人守險日與戰自夏至秋大小百餘合賊散走盡十人者先後歸而公與其弟實殿公以康熙三年試策論舉於鄉九年成進士選庶吉士授編修十二年分校會試尋乞假歸十三年耿精忠反海賊鄭錦踞泉州公奉親匿山谷間錦精忠並遣人招之以死固拒十四年夏密疏陳破賊機宜言閩疆徧小自二賊割據以來誅求鞭朴民力已盡賊勢亦窮南來大兵宜急攻不可假以歲月恐生它變方今耿逆悉力於仙霞杉關鄭賊并命於漳潮之界惟汀州小路與贛州接壤賊所置守禦不過千百疲卒竊聞大兵南來皆於賊兵多處鏖戰而不知出奇以擣其虛非計也宜因賊防

之疎選精兵萬人或五六千人詐爲入廣之兵由賴達汀爲程七八日耳二賊聞急趨救非月餘不至則我軍入閩久矣大軍果從小路橫貫其腹則三路之賊不戰自潰乞密勅令兵官偵謀虛實隨機進取仍恐小路崎嶇更使鄉兵在大兵之前步兵又在馬兵之前庶幾萬全可必勝置疏蠟丸中遣使聞道赴京因內閣學士富鴻基上之奏入

聖祖嘉公忠下兵部錄其疏令領兵王大臣知之時廣東叛亂大兵防守贛州南安未能入閩會康親王保書自衢州克仙霞關復建甯延平精忠降康親王駐師福州令都統拉哈達賴塔等進剿海賊並訪問公十六年正月拉哈達復泉州遣人往宣

諭公就見拉哈達於漳州。康親王疏言：光地矢志爲國，願沛不渝。宜予褒揚。下部議敘，授侍講學士。行至福州，丁父憂歸。十七年閏三月，同安賊蔡寅結眾萬餘，掠安谿。公募鄉兵百餘人扼守。城諸鄉毋資，賊糧匱，飢解去。六月，鄭錦遣僞總統劉國軒等陷海澄、漳平、同安、惠安諸縣，犯泉州。斷萬安江東二橋，南北拔絕。泉人恟懼。公遣善泗者從水關入，令堅守，待援時。拉哈達駐漳州。公遣使告急。值江水漲，道阻，乃導之由漳平安谿小路。公叔父日烜率鄉兵百餘度石珠嶺，開荆棘，架木橋以濟。公出迎十里外，具糧饌，犒車騎。軍又使弟光垕、光垠以鄉兵千度白鶴嶺，迎巡撫吳興祚軍於永春。大兵達泉州，大破賊，賊走人。

海拉哈達上其功。再下部議敘。遷翰林學士。公上疏推功將帥。辭新命。不允。日烺後積功。官至永州鎮總兵。御書方重。醕深額。賜之。十九年。公至京。授內閣學士。因面對言。鄭錦已死。子克塽幼弱。部下爭權。宜急取之。又言。內大臣施琅習海上形勢。知兵。可重任。

聖祖用公言。卒平臺灣。復疏言。編修陳夢雷當耿逆之變。有七旬。父母不能脫逃。致被逼脅。夢雷雖陷賊中。托病支吾。受臣密約。圖反正。請賞其從逆之辜。既法司坐夢雷斬。詔從寬免死。閏八月。

聖祖命公奏進家居所著文字。公彙其讀書筆錄及論學文字。

爲一卷。敘而進之。畧言道之與治。古者出於一。後世出於二。孟子敘堯舜以來。至於文王。率五百年而統一。續此道與治之出於一者也。自孔子後。五百年而至建武。建武五百年而至貞觀。貞觀五百年而至南渡。夫東漢風俗一變至道。貞觀治效幾於成康。然律以純王。不能無愧。孔子之生。東遷。朱子之在南渡。天蓋付以斯道。而時不逢此道與治之出於二者也。自朱子以來。至我。

皇上又五百歲。應王者之期。躬聖賢之學。天其殆將復啓堯舜之運。而道與治之統復合乎。臣雖無知。或者得依附末光。而聞大道之要。蓋隱然以見。知自任矣。二十一年。乞假送母歸里。二

十五年至京。補前官。尋授掌院學士。直經筵。二十六年。以母病乞歸省。命懸缺以待。二十七年夏至京。時值

孝莊文皇后喪。禮部劾公在涂遷延弗及叩

梓宮。請下吏部議。議降五級。得旨勿問。初。公嘗奏侍讀學士

德格勒有學行。善占易。而德格勒亦稱公有文武才。宜膺封疆。重寄。會天旱。

聖祖命德格勒撰著。因面諭大學士明珠過失。珠聞而大惡之。尋有言德格勒與同官誹議朝政者。

聖祖召試諸廷臣。德格勒以文劣。削五級畱任。尋又以私抹起居注爲掌院庫呼納所劾。下刑部議罪。有旨以前奏詰公。公

引罪乞處分。得旨。從寬免罪。九月。典武會試。二十八年。改通政使。擢兵部右侍郎。三十年。充會試副考官。九月。偕侍郎博竊徐廷璽。河道總督靳輔。往江南視河工。二十三年。提督順天學政。四月。聞母喪。有旨。令在任守制。公請給假九月。回籍治喪。不允。給事中彭鵬劾公忘親貪位。請令解任。俾在京守制。下九卿議。如鵬請。服闋。仍督順天學政。二十六年。遷工部左侍郎。督學如故。二十七年。授直隸巡撫。公在官。以清勤自勵。卹民隱。尤盡心於農田水利。二十八年。詔以漳水與滹沱合。易泛濫。其導漳河由運達海。以分滹沱之勢。公疏言。漳河現分爲三。一支自大名經魏元城。至山東館陶入衛。歸運。一支名老漳河。自山

東邱縣經南宮及青縣與完固口合至鮑家嘴歸運一支名小漳河自邱縣經廣宗鉅鹿合於滏。又經束鹿冀州合於滹沱。出衡水出完固口復分爲兩支。小支與老漳河合流而歸運。大支經河間大城靜海入子牙河而歸淀。今入衛之河與老漳河流淺而弱。宜疏濬其完固小支。應築隄逼水入河以達於運。更於靜海閘閘二莊挑土築隄。東水歸淀。俾無汎濫。報可。次第訖工。因奏霸州永清宛平良鄉固安高陽獻縣濬新河。占民田百三十九頃。請豁其賦額。從之。三十九年。疏定清釐虧空之法。又應詔條上科場事宜三則。學政事宜四則。均下部議行時。聖祖以子牙河屢汎濫。自河閒以北靜海以南皆被害。遂親

臨相視發帑金。命公於獻河兩岸築長隄。西接大城。東接靜海。亘二百餘里。又於廣福樓之焦家口開新河。引水入淀。由是下流益暢。無水災。公以隄工旣成。請開諸州縣水田。引漳滏。滹沱。大陸諸水。資灌溉。薦同知許天馥爲河閒知府。司其役。從之。畿屬固有八旗牧地。與民田相錯。歲久。民多占牧爲田。方奉部牒按驗。公令民自首者。按則輸糧。而免其隱漏罪。其隙地願耕者。聽民便之。明年修永定河工。自郭家務至柳全口。開河築隄。四十一年。飭所屬州縣。廣興水利。近山者導泉通溝。近河者引流。釀渠去水遠者鑿井。溉田其水道應修濬者。俱借帑興工。四十二年。聖書褒美。擢吏部尙書。巡撫如故。是年冬。以畿輔被

水請發倉賑貸。命富人出粟平糴。明年給事中黃鼎楫湯石曾許志進。宋駿業。王原等合疏劾公撫綏無術。致河間饑民散入京城。又匿甯津縣災。疏下公回奏。公言知縣陳大經報災不時已劾罷。至民有流離。臣不敢辭咎。請從重處分。詔原之。再疏辭尙書。不許。四十四年。疏劾前任雲南布政使張霖。假稱。詔旨鬻私鹽。得銀百六十萬兩。得旨卽令公審擬。霖論斬籍沒。十一月。授文淵閣大學士。時

聖祖臨御久日。潛心六藝之文。河圖象數之學。下逮濂洛關閩。書旁及厯算聲音之道。反覆研索。由源達流。公故篤信程朱。因以上窺羲文之秘。所奏進文字發舒心得。

聖祖未嘗不稱善凡御纂朱子全書及羣經性理諸編多命公參訂中有淆牘往復陳請不倦親承指授所造益深聖祖當詔廷臣知光地者莫若朕知朕者亦莫若光地嗚呼豈偶然哉然公自初入朝卽中立畏遠權勢其後位益高忌者益眾凡公所稱薦多見排擠因以撼公撫直隸時御史呂履恆劾公任意斷獄

上察其誣還其奏給事中王原劾文選郎陳汝弼受贓法司論絞汝弼公所薦也

上察知供證非實下廷臣確核得刑訊選人逼供行賄狀汝弼免罪承讞官降黜有差原以囑託私書爲汝弼舉首削職公恐

子祭葬。諡曰文貞。雍正元年。追贈太子太傅。十年。入祀賢良祠。公平生釋經之書。甚具其言。曰。蔑。訓。詁。者。無。師。滯。章。句。者。無。得。故。學。以。能。擇。爲。先。其。於。程。朱。之。說。篤。信。之。而。時。有。異。同。論。大。學。宜。還。古。本。而。以。知。本。爲。格。物。第。一。義。易。兼。綜。象。數。禮。兼。采。大。戴。記。論。子。雲。仲。淹。書。有。格。言。節。取。焉。可。也。康。節。象。山。所。造。高。明。慎。師。焉。可。也。知。言。者。以。爲。然。公。門。下。士。楊。名。時。李。紱。陳。鵬。年。趙。申。喬。冉。觀。祖。蔡。世。遠。並。以。德。望。重。於。時。它。若。張。昺。張。瑗。惠。士。奇。秦。道。然。王。蘭。生。何。焯。莊。亨。陽。之。徒。類。有。清。節。通。經。能。文。章。故。本。朝。諸。鉅。公。稱。善。育。材。者。必。以。公。爲。首。焉。所。著。有。周。易。通。論。周。易。觀。象。大。指。尙。書。解。義。洪。範。說。詩。所。孝。經。全。註。古。樂。經。大。學。古。本。

說中庸章段中庸餘論論語孟子劄記離騷經註參同契註握
奇經註陰符經註歷象本要二程遺書朱子語類四纂韓子粹
言古文精藻榕村語錄榕村講授榕村制藝榕村全集行於世
長子鍾倫字世得康熙癸酉舉人性至孝治經史性理旁及諸
子百家熟貫而析其義志氣卓然復從其叔父和卿治三禮於
周官戴禮尤精卒年四十有四著周禮訓纂二十一卷皆標舉
要義簡明質實不以考辨爲長其家學然也世得子清藻字信
侯少遊徐壇長何此瞻之門學博而醇康熙丁酉舉人已未舉
鴻博尋知興國縣決獄平允以勞卒官爲文踔厲風發於歷代
典章制度沿革莫不切究尤精於音學書法著有經史新記壁

經梅書辨贗及文集。次子清馥質厚安雅。其氣度於文貞爲近。由任子官郎中。出爲大名知府。以廉正著稱。

次子鍾佐字世諧。年十三。張文貞公見其文大奇之。曰吾畏友也。尋補諸生。精中西歷算法。指陳根裔千支萬湊不可胚胎。皆能冥悟。其子清植字穆亭。雍正甲辰進士。由編修官至禮部侍郎。清植子宗文字郁齋。乾隆戊辰進士。亦由編修官禮部侍郎。典試廣東陝西江南。督學河南順天。皆稱職。能傳其家學。

弟光坡字耜卿。性至孝。父病篤。炷香熟掌禱於天。果愈。家居不仕。潛心經學。著二禮述注六十九卷。光垵以軍功授通判。光垵官左都督。

季弟鼎徵康熙庚申舉人戶部主事鼎徵子天寵字世來號鑑
堂康熙乙未進士官編修生平勵節操遠於經學在史館二十
年與弟鍾僑鍾旺相依以注經講道爲業皆不取室人自隨子
清時乾隆壬戌進士由編修官山東運河道鍾僑字世邠號抑
亭康熙壬辰進士官編修天性孝友嗜學能文章閉戶窮經術
嘗兩校順天鄉試典試雲南視學江西以實行課士高安朱文
端每日百年中無或並也左遷國子監丞著有論語孟子講蒙
十卷詩經測義十卷易解八卷尙書周官皆有說子清載清江
清芳清愷能世其家學清載雍正庚戌進士兵部主事官知府
清江雍正癸卯舉人爲文援筆自書頃刻千百言奇趣天溢莫

能窮其巧。清芳乾隆丙辰進士。由編修歷官兵部侍郎。清愷雍正乙卯舉人。均以文名。鍾旺字世寶。鼎徵三子也。康熙戊子舉人。考授中書潛心洛閩之學。以薦充性理精義纂修官。著有憶訓錄。重申錄。周官劄記。諸經雜解等書。

同堂弟光型字儀卿。少問學於公。研究有心得。雍正丙午舉人。癸丑詔舉理學朝臣。以儀卿薦。特賜進士。官彰德同知。有循聲。改刑部主事。充律呂館三禮館纂修。著有崇雅堂文集。臺灣私議趨庭錄。光北字上卿。康熙戊午舉人。官教諭。精春秋內外傳。著有春王正月辨及伏窗文集。

傅清端公事畧

公諱傅臘塔。姓伊爾根覺羅氏。滿洲鑲黃旗人。康熙九年由筆帖式授內閣中書。遷內閣侍讀。擢御史。時海寇未平。福建提督萬正色以總兵吳定方等攻奪賊船。擒賊十二人。疏請議敘。部議以所獲有本汛奸人出境貿易者。不允所請。公疏言。不議敘官弁。恐巡緝懈怠。且有受賄隱縱諸弊。非所以安民弭盜。請敕部酌定章程。得旨。奸民山海貿易。情罪重。其本汛拏獲者。亦應議敘。著爲令。二十五年。授陝西布政使。明年。內擢副都御史。遷工部侍郎。尋以商人採輸楠木。工部監收遲延。議降調。上念公在部未久。寬免之。二十七年二月。命同侍郎多奇往

雲南按提督萬正色與總兵王珍互訐事。既啟行，調吏部侍郎。四月，授兩江總督。公至滇，鞠訊得實。正色、珍均論罪，有差。八月，公陞辭。諭曰：爾此行當潔已奉公。前任兩江總督無如于成龍者，爾效其所行可矣。公抵任，薦賢能，斥貪墨，獄明慎，摘伏如神。請免江甯號房蓬塔地租銀八千兩。先是贛縣民控告知縣劉瀚芳私征銀米十餘萬，並蠹役不法事。總督董納發司道集勘。公至，劾布政使多宏安。按察使吳延貴、贛南道鍾有德於吏役婪賂事，不卽勘鞫，復從輕定擬，曲爲庇護。請敕部嚴擬多宏安及延貴，有德並罷任。二十八上。

上南巡。諭江浙爲人文之地，學額應加增。下督撫詳議。公議

就大中小各學取入原額。每二名加增一名。二十九年春。淮徐所屬饑。公先發常平倉積穀賑恤。入奏稱。旨。五月疏劾大學士徐元文。原任尙書徐乾學。縱子弟爭利害民。巡撫洪之傑。徇私袒庇事。得旨。免究劾款。令元文休致回籍。汴陽縣民周廷鑑叩闕。訟降職侍郎胡簡敬佔產誣良。及巡撫洪之傑。贍徇狀。公奉命勘鞠得實。簡敬及其子弟治罪有差。之傑免。先是給事中何楷奏定科舉額數。部議每中額一名。準生員六十名。應試。是年八月。公署巡撫。監臨鄉試。入場時。諸生千百成羣。以未得預試。環訴而泣。公以定額未敢私增。慰諭散去。明年疏言。江南士子。每科應試者萬餘人。今限以額數。驟減三分之二。多

士擔囊負笈而來不獲一展所長殊深憫惜請廣增科舉額俾益加砥礪以副作人之化疏下部議增六十名爲百名三十二年廣東巡撫江有良與巡鹽太常少卿沙拜互訐命公往察勘得受贓不法各狀有良沙拜俱削籍三十三年疏言淮揚所屬多版荒田撫臣宋犂曾疏請緩征格於議臣履畝詳勘鹽城高郵等州縣因遇水災業戶逋逃者眾今田有涸出之名人無耕種之實小民積困之餘熟田額糧尙多懸欠何能代賠盈萬之荒賦倘拘責地保里鄰逃亡益多是使熟田盡變荒田於國課毫無裨益請恩賜蠲除則逃戶聞風懷歸安居樂業矣部議不許

上特諭曰糧從地出地爲水浸若征錢糧則於民甚苦其令免
征閏五月薨於位遺疏上詔稱其廉潔自持實心奉職懋著
勤勞命從優議卹復諭閣臣曰兩江總督居官善者自于
成龍以來惟傅臘塔一人能和而不流不畏權勢爰恤軍民深
副朝廷委任之意特遣太僕卿楊舒赴江甯致祭傳諭江
南官民曰爾等悲感傷痛朕亦聞知向來外官濫逝從來未有
此遣祭之例也部議賜祭葬復命加祭一次贈太子太
保謚清端子騎都尉世職子雙喜襲兩江士民爲建祠江甯四
十四年駕幸江甯經雨花臺
上指其祠曰傅臘塔居官甚優大有氣節人雖被劾無怨者

特賜額曰兩江遺愛。雍正十年入祀賢良祠。

阿文清公事畧 子文恭公富甯安

公諱阿蘭泰。姓富察氏。滿洲鑲藍旗人。由筆帖式累遷郎中。康熙十九年。議政王大臣等疏薦。公練習部務。自吳三桂叛後。專司軍機文檄。日夕勤勞。詳慎無誤。得旨以三品卿用。明年擢光祿卿。遷內閣學士。又明年充方畧館副總裁。兼明史總裁。敕習庶吉士。二十二年。擢兵部侍郎。兼管佐領。

上欲釐定戶部錢糧章程。察除積弊。特命公及侍郎陳廷敬。副都御史馬世濟。管理錢法。二十五年夏。擢左都御史。十一月。上閱平定三逆方略。論贊多舛錯。諭閣臣曰。平逆始末。阿蘭泰知之甚詳。可令酌改。務期紀事得實。二十六年。遷工部尙書。

以商人採輸枿木監收遲延。部臣並坐降調。

上念公任事未久。貸之。二十七年。調兵部尚書。尋調吏部。二十八年閏三月。

上以雨澤愆期。命公同尚書徐元文慮囚。奏減罪可矜疑者四十五人。甘霖卽沛。四月充三朝國史總裁。五月擢武英殿大學士。三十一年。陝西饑。公遵諭同河道總督靳輔議運江淮糧米。自黃河泝西安以備積儲。明年噶爾丹侵擾哈密。上飭令預備。公與內大臣索額圖等議增撥京兵一千及陝西兵三千付提督孫思克。相機勦禦。三十三年。復議噶爾丹逼近圖拉。請遣右衛駐守大臣費揚古。郎坦等往勦。尋以逆酋遠遁。

奏撤塞外新增驛站。詔費場古還軍歸化。郎坦兵亦罷。明年
上出古北口。巡歷塞外。命公司留鑰絲理章奏三十五年
二月。

上親征噶爾丹於克魯倫河。公仍留京與尙書馬齊佛倫直宿
禁城。特諭公曰。朕巡行後蒙古事情及一切章奏爾可閱視。
奏聞。九月。隨駕出歸化城。駐蹕黃河西界。經理軍務。十月。
以扈從勞。賜內廐馬奉命赴右衛卹賞隨征官兵。奏免各
軍借支銀兩俱稱旨。三十六年。充平定朔漠方畧總裁官。八
月。噶爾丹之台吉丹濟拉來降。

上駐蹕翰特穆爾嶺。御毯幄屏左右。召丹濟拉入見。公引

郎中阿爾法隨入侍

上命之出及丹濟拉退。召公諭曰爾偕降人入以防不測。此意甚善。朕令爾出欲推誠以示不疑耳。二十七年公與人學上伊桑阿均以年老善忘奏辭閣務。

上曰大學士最爲重任必公正和平任事謹慎者方稱職。至於記事學士可分任之。三十八年夏因伊公乞休。諭公曰爾與伊桑阿自任閣務以來凡事推誠布公不惟朕知之天下無不知者。雖以年老求罷朕不忍令去也。九月病劇。上欲臨視。遣皇子先往而公已薨矣。

上輟朝一日。

賜銀二千兩。

皇子及內人臣奠爵。

諭曰

阿蘭泰存心端誠。持守廉潔。宣力年久。懋著勤勞。可贈少保兼太子太保。子祭葬如典禮。諡文清。四十六年冬。

上與大學士馬齊評論內閣舊臣。稱公能強記且善於辨事。云雍正十年。詔祀賢良祠。

子富甯安。初襲騎都尉。由副都統遷倉場侍郎。晉左都御史。吏禮二部尚書。兼八旗公庫事務。清聲著聞。康熙五十四年。策妄阿喇布坦侵我哈密。命馳驛赴西甯視師。總統調度。五十六年。授靖逆將軍。駐巴里坤。命同振武將軍傅爾丹。副將軍祁里德。分界覘賊情形。卽親率兵襲擊準噶爾邊界。屢敗賊衆於皮禪城。俘斬甚衆。阿克薩爾坦等俱率衆迎降。進屯烏魯木齊。

賊避不敢犯。五十九年進兵烏蘭烏蘇。遣將分道襲擊。擒賊酋。卒奪馬百餘。破其所踞山隘。獲其台吉俘斬百餘人。別遣將諭降闊展城。回人進擊吐魯番。降其酋長。獲馬駝甚多。疏請率所部萬七千人各持三月糧分兩路進剿。詔傳爾丹濟師三千併其軍。明年有旨暫停進剿。時策妄阿喇布坦遷其所屬吐魯番回人而行。回人多不願往。中道遁回。且擊敗賊所遣宰桑赴我軍乞降。富甯安以聞。命率兵二千赴吐魯番收撫。安插未幾。賊眾來犯。乃遣將率兵四千往援。而自率兵四千進駐伊勒布爾和碩。調遣策應會官軍屢敗賊眾。賊遠遁。乃還駐巴里坤。疏言嘉峪關外布隆吉爾之西爲古瓜沙燉煌地。濱河土

沃若駐兵屯牧設總兵官一人統之可阨黨色爾騰之路又疏請專遣大臣領屯田諸處儲糧事宜又請以巴里坤牧駝運糧乘炎熱草盛時分起領運免至臨事張皇上並可其奏

世宗御極授武英殿大學士仍駐巴里坤管理軍務雍正三年賜勅獎諭并賜帑銀二萬兩四年冬還朝賜御用冠服並雙眼孔雀翎黃轡鞍馬及朝珠銀幣諭王大臣曰富甯安任將軍時一心肫篤諸務井井有條且行止端方廉潔年來領兵將軍聲名無出其右者益彰

皇考用人之明朕實嘉賴焉其錫世襲侯爵以示殊異於是由

騎都尉晉一等侯五月夏。諭獎其公勤忠實加太子太傅管
鑲白正紅二旗都統事是歲。命往西安署駐防將軍六年五
月坐苟且推卸奪世爵仍畱大學士六月薨於西安。諭稱其
人品端方操守廉潔勤慎小心始終一致下所司優卹覲歸令
陝西督撫料理所過地方官均於櫬前奠醑及抵京。遣郡王
及內大臣侍衛奠茶酒。諭賜祭葬予諡文恭十年秋與文清
公同入祀賢良祠。